



Número de expediente: 2018/NOMFUNCONTEMP/000019

## RESOLUCIÓN DO CONCELLEIRO DE GOBERNO RESPONSABLE DA ÁREA DE PERSOAL, RÉXIME INTERIOR E PATRIMONIO RELATIVA AO NOMEAMENTO DUN FUNCIONARIO INTERINO COA CATEGORÍA DE ARQUITECTO TÉCNICO PARA A SUBSTITUCIÓN DE DONA MARÍA DEL CARMEN SILVA RICOY DURANTE A DURACIÓN DUNHA BAIXA POR INCAPACIDADE TEMPORAL

Tras examinar o expediente tramitado para o nomeamento dun funcionario interino coa categoría de arquitecto técnico para a substitución da funcionaria dona María del Carmen Silva Ricoy durante a súa situación de baixa por incapacidade temporal, faise constar que:

### ANTECEDENTES DE FEITO

1.-No Boletín Oficial da Provincia do 22/05/2017 (BOP núm. 96), anunciouse a convocatoria pública para a formación, mediante o sistema de concurso-oposición, dunha lista de reserva (listas B) que permita prover de forma interina prazas dentro do Concello de Pontevedra coa categoría de arquitecto técnico, de acordo coas bases aprobadas pola Xunta de Goberno Local, na sesión que tivo lugar o día 08/05/2017.

Posteriormente, mediante resolución do concelleiro de goberno responsable da Área de Persoal, Réxime Interior e Patrimonio do 13 de novembro de 2017 acordouse prestar aprobación á lista única de reserva para a provisión interina de prazas de arquitecto técnico, grupo A, subgrupo A2, que se ordena segundo a puntuación total obtida polos aspirantes no procedemento selectivo, a proposta do sinalado polo tribunal cualificador.

2.- A Sra. Silva Ricoy é funcionaria de carreira desta Administración, sendo nomeada por resolución do concelleiro de goberno responsable da Área de Réxime Interior, Persoal e Actividade Económica do 4 de xaneiro de 2011 para ocupar unha praza de arquitecta técnica (Grupo A, subgrupo A2), tomando posesión con efectos económicos e administrativos do 16 de xaneiro de 2011.

Desde o día 25/09/2017, a traballadora dona María del Carmen Silva Ricoy se atopa en situación de baixa por incapacidade temporal.

3.- O 06/06/2018, o arquitecto xefe da Oficina Técnica de Licenzas e Inspección presenta un escrito onde, entre outros extremos, sinala o seguinte:

“(…) Finalizado o contrato por acumulación de tarefas de dous técnicos e estando de baixa por maternidade a Inspectora Urbanística (grupo A, subgrupo A2, segundo a RPT arquitecto, arquitecto técnico, enxeñeiro e enxeñeiro técnico), así como tamén, estando de baixa de larga duración, desde setembro de 2017, da Arquitecta Técnica (grupo A, subgrupo A2), segundo a RPT arquitecto técnico, cómpre formular a presente petición:

As comunicacións previas de obras e aperturas de locais, requiren unha tramitación especial que deberá dar resposta no prazo de quince días. Son estes expedientes os que día a día son necesarios ir resolvendo. O seu abandono provoca unha situación de colapso no servizo polo que resulta urxente e inaprazable a contratación dun técnico para realizar as tarefas de informe.

Estando vixente a lista única de reserva para a provisión interina de prazas de arquitecto técnico do grupo A, subgrupo A2, esta Oficina necesita cubrir o posto de traballo da Arquitecta Técnica.

En consecuencia, solicítase que se atenda a presente petición de cubrir as prazas de baixa existentes nesta Oficina con carácter urxente e inaprazable (...)”



4.- O concelleiro de goberno responsable da Área de Persoal, Réxime Interior e Patrimonio na súa proposta do 6 de xuño de 2018, dada a imposibilidade de prover este posto mediante unha redistribución dos efectivos existentes na actualidade nesta Administración municipal e á vista da necesidade exposta no informe emitido para estes efectos polo arquitecto xefe da Oficina Técnica de Licenzas e Inspección, esta concellería de goberno, xa que é imprescindible para o funcionamento desta administración a tramitación dos asuntos da súa competencia, **considera urxente e inaprazable** prover o posto solicitado mediante un nomeamento interino para a substitución da arquitecta técnica dona María del Carmen Silva Ricoy (CDG 4302) durante a duración da súa baixa por incapacidade temporal, e, en consecuencia, propón que se inicie o expediente para proceder ao nomeamento dun funcionario interino, correspondéndolles ao candidatos da devandita Lista de reserva (Lista B), de acordo coa súa orde de puntuación e requirindo aos interesados para que acepte ou renuncie no prazo de 48 horas, achegando a documentación preceptiva. En caso de renuncia proporase os seguintes candidatos en orde de puntuación.

O nomeamento interino só poderá estenderse durante a baixa por incapacidade temporal de dona María del Carmen Silva Ricoy, producíndose o cese automático do funcionario interino nomeado no momento en que a Sra. Silva Ricoy se reincorpore ao seu posto de traballo por cesar na situación de incapacidade temporal.

Cómpre sinalar nesta proposta expresamente a conveniencia de que, de ser necesario, os custes deste nomeamento interino se realice con cargo ás partidas orzamentarias que financian as prazas que se atopan vacantes na actualidade.

5.- Emitido informe polo Servizo de Persoal, o día 22/06/2018, pola Intervención Xeral Municipal infórmase o expediente sinalando, entre outros extremos, o seguinte:

#### **(...) 3.- RESULTADO DA FISCALIZACIÓN**

Polo anteriormente exposto infórmase o expediente de conformidade polo que procede continuar a tramitación do mesmo (...)"

6.- Con data 22/06/2018, don Moisés Táboas Fernández acepta a oferta de nomeamento como funcionario interino na categoría de arquitecto técnico que lle foi comunicada por este Servizo.

## **FUNDAMENTOS XURÍDICOS**

Primeiro.- O Real Decreto Lexislativo 2/2015, do 30 de outubro polo que se aproba o texto refundido da Lei do Estatuto Básico do Empregado Público, publicado no BOE de 31 de outubro de 2015, dispón no seu artigo 10 que son funcionarios interinos os que, por razóns expresamente xustificadas de necesidade e urxencia, son nomeados como tales para o desempeño de funcións propias de funcionarios de carreira, cando existan prazas vacantes e non sexa posible a súa cobertura por funcionarios de carreira ou para a substitución transitoria dos titulares.

O procedemento de selección de funcionarios interinos deberá realizarse mediante procedementos áxiles que respectarán en todo caso os principios de igualdade, mérito, capacidade e publicidade.

O cese producirase cando finalice a causa que deu lugar ao seu nomeamento.

Segundo.- A lei 2/2015 do emprego público de Galicia, dispón, no seu artigo 23.1.a) que poderá nomearse funcionarios interinos cando existan postos vacantes, con dotación orzamentaria, cando non sexa posible a súa cobertura por persoal funcionario de carreira. Os postos vacantes desempeñados por persoal funcionario interino deben incluírse na oferta de emprego correspondente ao exercicio en que se produce o seu nomeamento e, se non é posible, na seguinte, salvo que se decida a súa amortización ou, no caso do persoal docente, que a planificación educativa o impida.

No artigo 24.1 da lei 2/2015 sinálase que a selección do persoal funcionario interino realizarase mediante procedementos áxiles que respectarán, en todo caso, os principios de igualdade, mérito, capacidade, publicidade e libre concorrência.

Así mesmo, o artigo 24.2 dispón que o cesamento do persoal funcionario interino producirase,





ademais de polas causas que determinan a perda de condición de funcionario de carreira, cando finalice a causa que deu lugar ao seu nomeamento; por amortización do posto que ocupe; por adscrición provisional ao posto de persoal funcionario de carreira ou provisión definitiva do posto por persoal funcionario de carreira; por transcurso do prazo máximo de duración do nomeamento; por incumprimento sobrevido dos requisitos exixidos para o desempeño do posto e pola reincorporación da persoa titular do posto, no suposto da súa substitución transitoria.

O cesamento do persoal funcionario interino non dá lugar a indemnización, agás no casos en que por causa del a persoa cesada non poida facer efectivo o seu dereito a vacacións nos termos previstos polo artigo 132 desta lei.

Por outra banda, o artigo 25.1 establece que ao persoal interino élle aplicable, en canto sexa adecuado á natureza da súa condición, o réxime xeral do persoal funcionario de carreira e, no seu apartado 4 sinala que a prestación de servizos en réxime interino non constitúe mérito preferente para a adquisición da condición de persoal funcionario de carreira, porén, malia o anterior, o tempo de servizos prestados computarase nos supostos de concurso-oposición, nos termos que se establezan na correspondente convocatoria.

Terceiro.- Non obstante o réxime xurídico exposto nos apartados anteriores, cómpre recordar o disposto no artigo 19.Dous da Lei 3/2017, do 27 de xuño, de orzamentos xerais do Estado para o ano 2017, de aplicación a todas as administracións públicas, segundo o cal durante o ano 2017 non se procederá á contratación de persoal temporal, nin ao nomeamento de persoal estatutario temporal ou de funcionarios interinos, agás nos casos excepcionais e para cubrir necesidades urxentes e inaprazables.

Deste xeito, suprímese a esixencia prevista na Lei de Presupostos Xerais do Estado para o ano 2016, que establecía que os ditos nomeamentos se restrinxirían aos sectores, funcións e categorías profesionais que se consideren prioritarios ou que afecten ao funcionamento dos servizos públicos esenciais.

Á vista do citado artigo, infórmase que na solicitude do xefe da Oficina Técnica de Licenzas e Inspección xa se fai constar o cumprimento deste requisito, polo que cómpre remitirse a aquela, que máis arriba se reproduce.

Cuarto.- É competencia do Alcalde exercer a superior dirección do persoal ao seu servizo consonte o previsto no artigo 124.4.i) da Lei 7/85, reguladora das bases do réxime local e o artigo 13.2.i) do Regulamento orgánico do goberno e administración municipal publicado no BOP núm.248 do 28 de decembro de 2005.

Por Decreto da Alcaldía de 21 de abril de 2017 delegouse no concelleiro de goberno Responsable da Área de Persoal, Réxime Interior e Patrimonio as decisións, propostas e trámites en materia de persoal que sexan competencia da Alcaldía, así como o seguimento e control do cumprimento dos dereitos e deberes do persoal ao servizo do concello.

Atendendo ó exposto, esta Concellería de goberno no exercicio das súas atribucións delegadas,

## **RESOLVE**

Primeiro.- Declarar xustificada a necesidade urxente e inaprazable de efectuar o nomeamento interino dun arquitecto técnico adscrito á Oficina Técnica de Licenzas e Inspección para a substitución de dona María del Carmen Silva Ricoy durante a súa baixa por incapacidade temporal.

Segundo.- Nomear a don Moisés Táboas Fernández, DNI núm. 77001952E, arquitecto técnico da escala de administración especial deste Concello, co carácter de funcionario interino integrado no grupo A, subgrupo A-2, coas retribucións básicas correspondentes ao seu grupo de clasificación e as complementarias correspondentes ao posto de arquitecto técnico na Oficina Técnica de Licenzas e Inspección, con efectos do día 1 de xullo de 2018 e por un período inicial ata o 31/12/2018, que pode



ser prorrogado unha vez tramitado o oportuno expediente, advertindo ao nomeado que cesará no posto cando remate a baixa por incapacidade temporal de dona María del Carmen Silva Ricoy ou, de ser o caso, cando desaparezan as razóns de urxencia que motivan este nomeamento.

O nomeamento interino só poderá estenderse durante a baixa por incapacidade temporal de dona María del Carmen Silva Ricoy, producíndose o cese automático do Sr. Táboas Fernández no momento en que a Sra. Silva Ricoy se reincorpore ao seu posto de traballo por cesar na situación de incapacidade temporal.

Así o ordena e dispón o concelleiro de goberno responsable da Área de Persoal, Réxime Interior e Patrimonio por delegación do Excmo. Sr. Alcalde, ante o secretario da administración municipal, que DA FE da precedente Resolución.

